

DRURI I PIKËLLUAR

---

**ADEM ZAPLLUZHA**

**DRURI I  
PIKËLLUAR**

Redaktor:  
Riza Grejçevci

Recensent;  
Mazllum Baraliu

Lektor;  
Veli Velu

DRURI I PIKËLLUAR

---

ADEM ZAPLLUZHA

# DRURI I PIKËLLUAR

Shoqata e Shkrimtarëve  
“Fahri Fazliu”  
Kastriot, 2014



## **SONTE DUA TË LUFTOJ ME ÇDO KË, NËSE LYPSET, EDHE ME PERËNDITË!**

*Adem Zaplluzha: "Druri i pikëlluar", poezi, 2014*

Të thellohesh në leximin e veprimtarisë prodhimtare dhe poetike të njeriut me mbi një gjysmë shekulli me penë në dorë, duke ngarendur gjithandej kopshtit të jetës, vërtet e ke tepër zor që të mos bësh sytë katër, të kthehesh me fytyrë e zemër nga njeriu, fjala e tij, të bëmat, kënaqësitë dhe zallahitë e tij, të kthehesh, herë në kohë fëmijërie, herë-herë në ecejaket e kohës me plot të panjohura, të njohësh e të mësosh se si shkrihet çdo qelizë e poetit në gjirmën e prushimës të artit poetik, kjo do të thotë se ti, o kreshtar dhe dashamirë i poezisë je mrekulluar duke shëtitur me hare nëpër Parnasin plot me bukuri letrare.

Vepra e radhës me poezi **"Druri i pikëlluar"** i poetit më prodhimtar i këtij brezi, mëton të imponohet si motër siameze e gjithë atyre veprave të tjera që botoi deri me tash, mirëpo, ja që kjo që kemi para vetes në sy vështrim, për shumëçka qëndron më e avancuar. Sapo e hap lexuesi librin haset në ciklin e prapë të kësaj vepre, të cilit i prin poezia "Me lërë të qaj sonte", e cila sikur arrin të bashkojë në një trup të gjitha takimet e poetit me shokun e brezit, të cilit i thotë:

**Sonte mund të luftoj me tërë botën  
Por jo edhe me zemrën time!**

Sepse, zemra e poetit kërcen si ketër në kraharonin  
e tij, prandaj  
prapë i rikujton shokut:

**Të kujtohet sa shumë  
Ecëm mbrëmë  
Rrugët ishin të gjata  
I përngjanin dhembjes sonë  
Ti ishe vetëm një lule  
Në varfërinë e stinës...**

Takimi mbi valsën e vargjeve i dy shokëve, gjithsesi  
është i mallëngjyeshëm, i tujgur me emocione,  
mirëpo, poeti prapë vargjet poetike janë ato, me të  
cilat i rrëfëhet për gjithçka shokut të tij, e pse, jo,  
edhe për gjendjen momentale të vetë poetit:

**Jam shndërruar në gur varri  
Askush nuk më kupton  
As të vdekurit nuk më duan  
Si të eci nëpër këtë sterrë  
Si të qëndroj  
Pranë kësaj ofshame!**

Ajo që vargjet poetike të kësaj vepre i bën  
lëngështa, të buta, të kapshme, interesante,  
dinamike, me vokacion të ngrehur, është rrëfimi i  
butë dhe real i poetit, me vargje poetike, jo edhe aq

në tepri për biografinë e sendeve, rrethit të jetës, gjërave që përbëjnë spektrin e gjallimit, mirëpo, zoti Ademi depërton si ngjalë në thellësi të meditimeve dhe imagjinatës gjithnjë reale, sa për të gatuar brumin e fëmijërisë, të djalërisë, të burrërisë, kështu për të bërë një biografi të jetës së vet. Jeta është e bukur, e ëmbël, e çmuar, por, herë-herë, shklasë poetin, kurse ky menjëherë reagon dhe tregon gjendjen e tij, por jo edhe dorëzimin:

**Thashë edhe më parë**

**Më ikën miqtë**

**S'ka mbetur më njeri**

**Në këtë fotografi**

**Vetëm disa silueta si gur varri**

**Rrinë ngulur nëpër sinorët e kujtesës.**

Me vargje poeti mishërohet me qiellin, me yjet, me detet, me lumenjtë, me zogjtë, me bjeshkët, shkrepat, por, Toka për poetin është djepi, gjaku, gjuha, identiteti, dheu, prandaj vjershërimi për Tokën vërtet zgjon kureshtje:

**Kjo tokë e mirë**

**Sa herë që e vura kokën mbi të**

**Mi shëroi plagët e hidhura**

**Edhe në dimrat më të acarta**

**Pati mirësinë të mi ngrohi damarët**

**Herë e pata nënë e herë babë**

**Asnjëherë nuk ngjau të ofshante**

**Dhembjet ishin të huaja për të**

**Toka ime ngjizur me legjenda**

**Toka ime**

**Djepi i stralltë i gjyshërve të mi!**

Në shumë prej vargjeve të kësaj vepre dominon përshkrimi aq i hollë, aq i vëmendshëm, aq dinamik, sa frymëzimi sa vjen e merr gradacion të ngritur. Vërtet janë të bukura, muzikale, por që në vetvete fshehin atë sekretin e poetit për shumë çka e zemrës, vargjet me të cilat poeti përlij metodën diskriptive, por jo aq e thjeshtë, banale, por moderne me mjete e figura të zgjedhura shprehëse dhe me një vokacion të avancuar. Përvoja në lërimin e poezisë e bën të veten, e lartëson poetin, e bën të këndshëm, të dashur dhe më të afrueshëm, siç ndodh në vargjet:

**Më ndihmoni ju lutem**

**Kam nevojë**

**Kam shumë nevojë sonte ta ndjej**

**Aromën e barit të atdheut**

**Atë aromë**

**Me të cilën zuri shtat fëmijëria ime!**

Vargjet e Zaplluzhës nuk ngarendin pas përrallave, legjendave, kornizave imagjinare e të mbufatura me fjalë e shprehje banale, por, nga se poeti di të shkruaj poezi, atëherë ai me vargje poetike depërton në secilën pore të jetës, në secilin cep të

vendit të tij, edhe në vendlindje, në Prizrenin  
magjik, me të cilin rast, shkruan:

**Në behar si ujëvarë zbresin zambakët**

**Gocat dashurojnë pa mend**

**Lumëbardhi si dhëndër që s'plaket**

**Çdo stinë është e bukur në Prizren!**

Vepra më e re e Zaplluzhës “Druri i pikëlluar”, vërtet ngjitet edhe më lartë drejt kurorës së artit të poezisë, duke dëshmuar pa tjetër se me poezi u morën, merren dhe do të merren brezat edhe pas nesh, shumë dashamirë të saj, por sikur shpesh po harrojmë se të shkruash poezi do të thotë poeti të shkrihet në secilin varg, në secilën rimë, në secilën metaforë, si ai qiri i Naimit, vetëm e vetëm që “të shkelë këmba e saj!”. E unë, poetit Adem Zaplluzha , i uroj shëndet dhe të mos i plaket edhe shumë stinë pena, me të cilën e pasuroi aq shumë letërsinë.

*Riza Greiçevci, shkrimtar,  
mesprill i motit 2014, Drenicë*



*Disa hije të blerta*  
*Cikli i parë*



## MË LËRË TË QAJ SONTE

Sonte mund të luftoj me tërë botën  
Por jo edhe me zemrën time  
Mos ik e dashur  
Më lërë ta mbështes kokën  
Mbi gjoksin tënd  
Më lërë të prehem deri në amshim

Nëse ti kundërshton  
Dua të mbështes dhembjen time  
Për atë dru me zgërbonjë  
T'i recitoj deri në agullimë  
Poezitë e shkruara  
Enkas për dashurinë tonë

Kjo natë e gjatë  
Kush e di se ku e harroi gjumin  
Më lërë të qaj sonte  
Deri në mëngjes  
Më lërë të dënesi në prehrin e ëndrrës

2.

Sonte kemi sa të duash kohë  
Udhëtimi i jonë do jetë i gjatë  
Prej një rrugë të kalldrëmtë  
Do të kalojmë në një rrugë tjetër  
Pranvera nuk vjen  
Nëse kafshojmë mollën e papjekur

Të kujtohet se sa shumë  
Ecëm mbrëmë  
Rrugët ishin të gjata  
I përngjanin dhembjes sonë  
Ti ishe vetëm një lule  
Në varfërinë e stinës

Të thash kemi kohë  
Mbase është pranvera  
Por kallkanët po pikojnë si lotët  
E nuseve nga çatitë e rrënuara  
Dimri ishte i pa përshtatshëm  
Na ngriu lotin në sy

3

Kurse ne përherë kishim kohë  
Blinim byrek me djathë  
Ngase ty  
Nuk të pëlqente aroma e mishit

Kallkanët shkriheshin  
Diku pas maleve  
Si një zogë nga veja  
Dielli e nxirrte kokën  
Nga përgjumja e mëngjesit

Pemët shkundeshin nga të ftohti  
Behari kishte nisur  
Me i çelë lulet më të bukura  
Kurse sytë e tua të gështenjta  
I përngjanin dy gurëve safiri

4.

Ti nuk e kuptove dhimbjen time  
Me fashat e kujtimeve  
I lidhe plagët e kohës  
Ashtu siç thoshe  
Koha shëron çdo shpirt të vrarë  
Por ja  
Asgjë nuk shëroi gjëma e bagremit

Kjo natë e gjatë  
Pa asnjë dalje nga dhembja  
Më rri sonte mbi kokë  
Si ajo shpatë e përrallave  
Më rri po ai kërcënim  
I fjalëve të akullta të erës

5.

Nuk është koha  
Kur njerëzit dorëzohen  
Unë nuk i besoj më askujt  
Ti i shembe të gjitha urat  
Si mund të kaloj  
Përtej bregut të dhembjes  
Si mund të iki  
Nga ky trishtim që lëshojnë degët

Jam shndërruar në gur varri  
Askush nuk më kupton  
As të vdekurit nuk më duan  
Si të eci nëpër këtë sterrë  
Si të qëndroj  
Pranë kësaj ofshame

6.

Sonte dua të luftoj  
Me çdo kë  
Nëse duhet  
Edhe me perënditë

Por më lëshoni njerëz  
Largojeni këtë këmishë  
Të bardhë  
Nga lëkura ime e djegur

Sonte tërë botës  
I kam shpallur luftë  
Dua të sfidoj çdo kë  
Por këtë nuk mund ta bëjë  
Me zemrën time të thyer

*Prishtinë, 20 dhjetor 2013*

7.

Kjo ditë për befasinë time  
I ka hapur sytë  
Më shikon si të ishte e dehur  
Dy pika lot  
Ortek i bardhë bore  
Rrokullisen teposhtë mollëzave

Gjethet e zverdhura  
Bien nga degët e thyera  
Thyhen edhe shtrezet e kristalta  
Të një mëngjesi të vrarë  
Dy zogj të verdhë  
Plandosën për tokën e zhuritur

Nga kajsishtat po ikin lejlekët  
Kanë zënë të dorëzohen stinët  
Shirat e kësaj vjeshte  
Po u përngjajnë njerëzve të vetmuar

Drurët dënesin  
Me një vajë të pashuar  
Dënesin me lot drerësh  
Një mall i largët  
Paska mbetur peng te korijet

8.

Dje ishte një ditë pa ngjarje  
E tejzbrazur  
Asnjë fjalë nuk shënova në ditar  
Vetëm era mbeti e gozhduar  
Si një kryq në shpirtin tim

Ti nuk ishe askund  
Mendimet e tua i lë diku tjetër  
Mbetën jashtë mureve të kujtesës  
I përngjaje pendës së një zogu  
Që kishte pësuar një metamorfozë

Unë e dija  
Herët a vonë ti do të pendohesh  
Dhe sot po qan  
Si mjellma në sytë e detit të tërbuar  
Po qan me varkat e fundosura

9.

Më kujtohet  
Ishte ditë e vranët kur ti u largove  
Atë ditë binte një shi i prushtë  
Binte  
Një lloj lagështie e padurueshme  
Në tërbimin tim të shfrenuar

Askush e as ti  
Nuk jeni në gjendje të kuptoni  
Ngrysjen e sterrës së qiellit katran  
I tillë ishte qenia ime  
Mbuluar me një tyl trishtimi

Nuk di më  
Sa here që preki nëpër trupin tim  
Nuk i ndjej të prekurat  
Ndoshta as që ekzistoj në këtë lojë  
Jam shndërruar në diçka  
Që nuk i përngjan asnjë forme ekzistuese

10.

Si një dru shkretëtire  
Kam mbetur në këtë oazë vetmie  
Kudo një boshllëk i tejdukshëm  
Duart e mia të nakatosura  
Prekin hijen e thyer të pritjes

Dielli paska ikur tej përtejmes  
Merimanga vrasëse  
Thurë rrjetin e dyshimtë  
Ky dimër posa i mbylli portat  
Acari i kristaltë  
Hyri në shpirtin e kallkanëve

Dikur vonë  
Filluan të duken meteorët  
Vraponin qiellit kuajt e verbër  
Si trenat e dehur hungëronin lukunitë  
Një natë si kjo  
Mos të ndodhtë me asnjëherë

11.

Më ikën miqtë  
Asnjë mikeshë nuk ka mbetur  
Në kornizën e thyer të kujtesës  
Nga kjo fotografi po largohen hijet  
Çdo gjë po zhduket çka ishte e imja

Vetëm një zë i vetmuar  
Bredh rrugëve të fëmijërisë  
Jashtë mureve gurëzohen fjalët  
Kjo kornizë e zbrazët  
Rri në heshtje  
Rri dhe kuvendon me vetveten

Thashë edhe më parë  
Më ikën miqtë  
S'ka mbetur më njeri  
Në këtë fotografi  
Vetëm disa silueta si gur varri  
Rrinë ngulur nëpër sinorët e kujtesës

## KU VDESIN KUAJT E LUFTËS

Nëpër shëtitorët e qytetit  
Njerëzit blejnë dhe shesin kotësinë  
Ajri i ndotur turbullon mendjen  
Kafshimi i një gjysmë molle t'i rrudhë buzët

Këtu shiten disa lloje protezash  
Prej atyre të njerëzve me një këmbë  
Deri te ata  
Që përtypen si qetë e lodhur  
Proteza gjymtyrësh dhe fjalësh

Ky treg i çuditshëm  
Për çdo ditë  
I shtrinë krahët kah perëndimi  
Shkon deri atje  
Ku vdesin kuajt e luftës

Kur janë ditët me shi  
Çmimet kanë një rrënje  
Marramendëse  
Zbresin deri në atë shkallë  
Sa që askush nuk blenë  
E as nuk shet më asgjë

## VESHI JONË ANEMIK

Kur ecim  
Nën hapat tona sklerotike  
I fshehim të gjitha mungesat  
E mundshme  
Ato të pamundshmet  
Fundosen vetvetiu në qenien tonë

Kur pas shpine dikush na thërret  
Veshi i jonë anemik  
Bëhet se s'dëgjon fjalë njeriu  
Injoron zukamën e mizës  
Kur fluturon rreth boshtit të vetë

Mbrëmjeve ecim rrugëve të parrugë  
Me një të kërcyer  
Kapërcejmë vigun  
Që ndan qytetin në dy pjesë

Përtej zërit të drurit  
Nuk jemi në gjendje të dëgjojmë asgjë  
Vetëflijohemi  
Si fluturat e demoralizuara

Kur ecim nën hapin tonë sklerotik  
I numërojmë mëkatet e ditës  
Dhe më pastaj  
Për ta shfajësuar vetveten  
Para syve të botës vetë ndizemi si qiri

## I MJELIM KALLKANËT

Dremisim pak si të humbur  
E pak si të dehur  
Nën hapat e lodhura të erës  
Ndalemi te druri i përmallimit  
Nëse kemi lot  
Qajmë deri në mëngjes

Nëpërmjet shijes së hidhur  
Të amalgamës së verdhë  
Përtypim vuajtjen  
Si kau i tërbuar e përtypim ditën

Barin e egër te shëlgjishtet  
E hedhim pas shpinës së erës  
Si të shastisur  
I shikojmë njerëzit në sy  
Dhe qeshim pa hezituar  
Derisa takohemi me vetveten

Kur na premtton koha  
Shndërrohem në iluzionist  
Dhe i kafshojmë  
Çmendurisht i kafshojmë gishtat tona

2.

Nga sythat e degëve të mollës  
Shkulim ekstazën e dremitur të pranverës  
Dhe në heshtje  
Si në një procesion  
I shikojmë ndryshimet atmosferike

Pastaj si përherë  
Shtiremi se jemi të pafajshëm  
Dimrin e presim me gjakftohtësi  
Kur kemi kohë  
I mjelim kallkanët  
Nga shpirti acartë i dimrit  
Nxjerrim një lloj eliksiri  
Për shërimin e plagëve nga fjalët

## **NJË MJEGULL E DENDUR**

Nuk di se kah po shkojnë  
Ose nga po vijnë kalorësit  
Kush i shtrydhi mjegullat  
Nga lotët e mendimit tim

Një dorë e zgjatur hyri në baladë  
I shkundi pemët e kujtimeve  
Cila nënë qante mbrëmë  
Dhe lotët u bënë shtrezë pikëllimi

Qe disa net me radhë  
Nuk pushojnë krakëllimat  
Një mjegull e dendur  
Po zbret nga malet  
Zbresin edhe tërbimet e lukunive

Mbase po ndryshojnë kohërat  
Nëpër degët e thyera të plepave  
Bulëzojnë piskamat  
Nuk reshtin  
As zërat e trishtuara të kukuvajkave

## **FISI IM**

Duke filluar që nga gjeneza  
E deri më sot  
E tërë bota  
Ngarend pareshtur  
Dhe s'ndalet akoma  
Duke e lakmuar tokën e premtuar

Kurse fisi im  
I lindur nga ky gur stralli  
Nuk vrapoi pas asnjë toke  
Aq shumë e deshi  
Këtë gur urori  
Sa që u ngjiz  
Me shpirtin e tij të stralltë

## **PËR NJË PUTHJE**

Njeriu akoma nuk ndryshoi  
Për një puthje  
Është në gjendje të transformohet  
Edhe në djall

Nuk i përkulet asnjë perëndie  
Mbretërit nuk ekzistojnë  
Në gjeografinë e shpirtit të tij  
Sa ora abdikon  
Nga çdo e drejtë njerëzore

Për dashuri  
Hi e pluhur bëhet  
Vetëm për një puthje të zjarhtë  
I zbret nga froni i Olimp  
Perënditë e të gjitha kohërave

## **TOKA IME**

Kjo tokë e mirë  
Sa herë që e vura kokën mbi të  
Mi shëroi plagët e hidhura  
Edhe në dimrat më të acarta  
Pati mirësinë të mi ngrohi damarët

Herë e pata nënë e herë babë  
Asnjëherë nuk ngjau të ofshante  
Dhembjet ishin të huaja për të  
Toka ime ngjizur me legjenda  
Toka ime  
Djepi i stralltë i gjyshërve të mi

Edhe nga një largësi  
Sa herë që më merr malli për ty  
Unë kthehem me zogjtë e mendjes  
Të përqafoj aq shumë  
Sa që çmallem  
Për njëmijë vjet të ardhshëm

## AS GURI I VARRIT TË GJYSHUT

Sot paskam shumë pak kohë  
Dua ta mbështes kokën për atë muranë  
T'i dëgjoj thirrjet e nëntokës  
Si dikur  
Kur i dëgjoja se si vraponin  
Kalorësit e shirave

Ju lutem  
Mos më largoni nga kjo kënaqësi  
Unë nuk ika nga atdheu im  
Pse desha

Më përzunë çakajtë e egër  
Më dëbuan përtej deteve  
Sa që sot  
Nuk më njeh  
As guri i varrit të gjyshit

Më ndihmoni ju lutem  
Kam nevojë  
Kam shumë nevojë sontë ta ndjej  
Aromën e barit të atdheut  
Atë aromë  
Me të cilën zuri shtat fëmijëria ime

## PËR PUSHKËT E GJYSHËRVE TANË

Ishte një rrugë e gjatë  
Ne ecëm  
Ecëm pandërprerë  
Nëpër dendësinë e një mjegulle

Drurët dhe lisat na bënë konak  
Gjethet i patëm dyshek e jorgan  
Na mbulonin shpatullat  
Si dashuria e atdheut

Kur kishim etje  
Nëpër zgërbonja lisash pinim ujë  
Çmalleshim me këngët e erës  
Atdheun e kishim shumë afër  
Më afër  
Se lëkurën tonë të grisur

Më kujtohet  
Si sot më kujtohet  
Kur vinte mesnata  
Yjet uleshin në sofrën e madhe  
Të kësaj toke të përvuajtur  
Uleshin dhe pareshtur na tregonin  
Tregime fantazmagorike  
Për pushkët e gjyshërve tanë  
*Prishtinë, 21 dhjetor 2013*

## **DISA HIJE TË BLERTA**

Nëpër rrugët e qytetit tim  
Kanë zënë  
Të ecin lakuriq perëndit e dehur  
Pa e përfillur askënd  
Kalojnë tej shëtitoreve  
Shkojnë deri te dyqanet e kukullave

Një shi i dyshimtë po bie mbi flokët  
E shprishura të kambanës  
Disa hije të blerta  
Ngjizen me muret e mykura  
Nën Urën e Gurit myshqet lozin  
Një valle të lashtë mortore

Këndeji pari kalojnë edhe endacakët  
Profetët blejnë dhe shesin disa lloje  
Librash të shenjtë  
Nëpër skutat e faltoreve  
Herë kyçen  
E herë shkyçen qirinjtë  
Prej dhjamt të mjegulluar të kujtesës

## **KUSH I SHKUNDI MOLLËT**

Kjo trajtë e këtyre fjalëve  
Disi po rri varur në kujtesën e erës  
Kush i shkundi mollët  
Kur arratisej pema e vetmuar

Nga qenia e hidhur e dhembjes sime  
Pikonte po ajo dhembje  
Si e Gjergjit  
Që asnjëherë nuk u shërua

Mbrëmë askush nuk trokiti në dritare  
Asnjë hap klandestin  
Nuk kaloi pranë çezmës  
Vetëm disa hije të trishtuara  
Ikën tej plepave të prera  
Nata u fundos në dhembjen e Titanikut

Humbën edhe zërat e mjegullave  
Shirat tani më  
Shkuan të pushojnë në brigjet e etjes  
Tatuazhi i një sfinksi prej dune  
Kishte zënë myk të verdhë  
Nga rrjeti i shqyer i merimangës  
Pikonte eliksiri i së nesërmes

## QË NUK I PËRKET NJERIUT

Kalojmë rrugëve  
Ose notojmë deteve si anijet lugetër  
Fundosemi mes gotave të palara  
Rrimë me natën e dehur  
Dhe deri në mëngjes  
Kërkojmë vetveten mes tavolinave

Dikur kur dielli i mykur  
Na shikon me një sy  
Ne veç atëherë bredhim  
Si bryma e verdhë  
Nëpër të kaluarën e erës  
Bredhim pa asnjë qëllim shtigjeve  
Të mbetura peng kujtesës

Kur përfundon kjo aventurë  
Ne i kërkojmë duart tona  
Diku nëpër librat e vjetër  
Ose në mesin e mbeturinave  
Ku flenë  
Shiringat e të gjitha sëmundjeve

Një zë asnjans  
Që nuk i përket njeriut  
E as zërit shurdhues të shpendëve grabitqar  
Më rri afër mbamendjes

Dhe troket  
Pandërprerë troket në kujtesën e erës  
Ky zë shurdhues  
Mos qoftë në shpirtin tim

Po frynë një furtunë e çmendur  
Ora në stacionin e trenit  
Ka kohë  
Që është ndalur dhe nuk punon më

*Një dru i pikëlluar*  
*Cikli i dytë*



## NGA TRARËT E TYMOSURA

Pa reshtur po shkundet qielli  
Flokët e akullta dridhen  
Po dridhen  
Si kallkanët e kujtesës  
Duart e plagosura të stinës

Mëngjesi i acartë  
Po i shkund këmishët e trishtimeve  
Një stinë si këtë të sivjetmë  
Mos pafsha më asnjëherë

Trenat si kuajt e dehur  
Po hingëllojnë  
Çatitë janë rënduar  
Nga një bardhësi e paepur  
Jashtë mureve të mendjes  
Qajnë fëmijët e braktisur

Kjo kohë e ngrirë i ka hapur sytë  
Dhe shikon pasqyrën e thyer  
Asnjë udhëtarë nate  
Sonte s'trokiti në portat e hanit  
Nga trarët e tymosura  
Kanë filluar të zgjohen krismat

## VETËM HESHTJA E ZHVESHUR

Eci nëpër këto shtigje  
Askund s' shoh trajtën e ndonjë udhe  
Nata e ngarkuar me sterrë  
Pas shpine troket  
Troket e s' ndalet në mendjen time

Disa pika shiu po bien  
Pareshtur  
Trokasin në xhamat e syve

Me mua ecin edhe drurët  
Një rrugë e largët para nesh  
Në këto çaste shtrihet  
Si një shpresë e pa arritshme

Vetëm heshtja e zhveshur  
U bashkohet siluetave  
Të shthurura të mendjes

Degët e thara të lisave  
Trokasin nëpër kujtesë  
Sa i largët  
Më duket mëngjesi i kësaj nate

## KUR AJO QANTE ME NGASHËRIM

Në syrin antik të portretit  
Dënes një kornizë e thyer  
Jashtë mendjes së kallkanëve  
Rri strukur  
Shikimi i meteorit të verbër  
E tërë lagja mbrëmë festoi  
Shkundjen e mollës së egër

Erdhën dhe ikën fëmijët  
Sa ora nën një çati  
U mpinë dhëmbët e shiut  
Mjegullat lëviznin ngadalë  
Në anën e kundërt të akrepave të orës  
Nuk pushonin zërat

Një tren i çmendur  
E kishte humbur rrugën  
Udhëtarët e hershëm kacafyten  
Si gjelat  
Nga valixhet e drunjta  
Zunë të ikin  
Të gjitha ëndrrat  
E shirave të vonuara

Pranë binarëve të shthurur  
Disa pasagjer të vonuar  
Pinin kafen farmak  
Fërshëllima e fundit e trenit me avull  
Zuri të kotej  
Kur ajo qante me ngashërim  
Në prehrin e mëngjesit

*Prishtinë, 22 dhjetor 2013*

## NJË MJEGULL E PËRHIRTË

Ike nga realiteti  
As në ëndërr më nuk të njoh  
Në çdo kohë  
Po shkunden pemët  
Një fantazmë më rri mbi kokë

Më rri si guri i murrmë  
Dhe kryqi im i i harruar  
Te një dunë prej varri  
Po qan një zog i zi

Shirat më nuk vijnë kënde  
U pëlqejnë aromat e jodit  
Dhe të valëve të kripës  
Unë merrem me vetveten time  
Por kot  
S'kam se çka tu bëjë duarve

Nga korijet e memories  
Kanë zënë  
E po largohen kojrrilat  
Është tmerr  
E përtej tmerrit  
Kur e ndjen vetminë e vetmuar  
Në shpirtin klandestin të erës

As sonte e as nesër  
S'do të trokas askush  
Në Xhamat e thyer të kujtesës  
Një mjegull e përhirtë  
Me vite të tëra  
Paska mbetur peng  
Në syprinën e trishtuar të liqenit  
Me ngashërim të paparë  
Dënesin pulëbardhat e plagosura

## ÇFARË TË BËJË NË KËTO ÇASTE

Sonte bënë të ftohtë  
Mbi telat e kitarës bie teri  
Një ter i zi  
Si vreri sillet vërdallë meje  
Vetëm një copë e heshtjes  
Bënë shaka  
Me lagështinë e trishtueshëm të mureve

Mos ndjefsh dhimbje të tillë  
Rrëqethen thinjat e flokëve të erës  
Një mal me sëmbim lëshohet  
Lëshohet ngadalë mbi trupin tim  
Lëmekem  
Si korret e thata më lëmeken këmbët

Çfarë të bëjë në këto çaste  
Me kollitjen e erës  
Dy duar përqafojnë drurin e thatë  
Ka kohë që kanë ikur zogjtë  
Nga shterpësia e zërit  
Ku asnjëherë s'dinë të ndalen shirat

## **DISA IKONAVE TË ARDHURA**

këto pak gjëra në dhomën time  
Kurrë nuk kanë qenë të miat  
Ishte dikur një tjetër njeri  
Para meje  
Ky brisk rroje ka lëruar  
Me qindra fytyra të lëmuara

Në tehun e mprehtë  
Ka një erë gjaku  
Që nuk i përket ADN-së sime  
Mbase i takon ndonjë tjetër krijese  
Ardhur nga galaktika

Sa herë që fërshëllez nën dush  
Dëgjoj një këngë të lashtë  
Prej uji e cila hynë  
Dhe del si një ikanak  
Nga flluskat e fryra të shkumës së sapunit

Thonë se dikush tjetër ka banuar  
Në këtë dhomë romboide  
Ja mbi këto korniza në formë të trekëndëshit  
Shihet fare çartë se i kanë takuar  
Disa ikonave të ardhura  
Nga një tjetër hapësirë e panjohur

## NË ÇDO KAFSHIM FSHEHARAK

Shiko miku im  
Shiko se si po ecën ky njeri  
Çdo hap që e hedh i përngjan  
Ecjes së drurëve halor

Sa herë që i ngrit duart lartë  
Nga gishtat skelet  
Shkunden me qindra gjethe  
Mos më thuaj  
Se nuk i përngjan drurit të egër

Edhe kur hanë  
Nuk i përngjan njeriut  
Ka një tjetër lloj kafshimi  
Sa herë që i shtrëngon dhëmballët  
Kërcëllojnë si binar trenash

Ka një uri të paparë  
Është në gjendje me përtypë  
Edhe gurin e stralltë  
Në çdo kafshim fsheharak  
Nga shkëndijat e pabesa ndizen  
Fusha të tëra kallamesh

## MURET AKOMA PËRPLASEN

Muret përplasen mbi kokën time  
Tavolina e çrregulluar  
Mezi qëndron në këmbët e veta  
Sa me afsh i putha mbrëmë  
Të dy buzët e gotës së dehur

Nata ishte e gjatë  
Unë ti dhe shishja e verës  
Këndonim një serenatë  
Degët e shimshirit na bënë hije  
Kurse hëna me qesëndi na shikonte  
Nga një këndvështrim i zogut rebel

frynte një fllad i freskët mali  
Nga vrimat e kujtesës  
Fluturuan zogjtë  
Këmisha ime e fëmijërisë  
U lëshua në gjysmë shtize  
Muret akoma përplasen  
Për kokën time të shthurur

## **NJË YLL GJASHTË CEPASH**

Ishte natë  
Ndoshta qielli kishte një pamje alergjike  
Orë e çast yjet endacak  
I ndërronin vendet  
U përngjanin  
Anijeve të fundosura

Peshqit fluturues rrinin mbi një kep  
Dhe shikonin të habitur  
Se si një hënë e bluar  
Në qindra copëza të kristalta  
Dukej si stërkalë shiu

Meteorët vraponin si kuajt e egër  
Nëpër qiellin e grisur  
Nuk ndaleshin  
As ngarendjet e kometave  
Një yll gjashtë cepash  
Mbi petalet e trëndafililit të gurtë  
Ëndërronte diellin

## NË EGON E TYRE TË SHPËRFILLUR

Kur hidhërohen njerëzit  
Ngjajnë papagajve që flasin shumë  
Mbështeten për muri të kalbur  
Derisa bien për toke  
S'lëvizin vendit

Jetojnë nën peshën e etheve  
Kanë një ndjenjë të akullt  
Hidhërimin e pranojnë si virtyt  
Dhe si të tillë  
U përngjajnë drurëve që flenë dimrit

Kur dalin nga rruga e së keqes  
Me të mbathura sportive  
Vrapojnë rrugëve  
Që vuajnë nga ethet e zeza  
Nuk ndalen askund  
Derisa të shfajësohen nga mëkati i tyre

Ecën këta njerëz  
Pa ditur askurrë se ku  
Dhe kur do të mbërrin  
Në egon e tyre të shpërfillur  
Që nga mosha e adoleshencës

## RRUGËVE QË NUK KANË DALJE

Shpeshherë më pyesin  
Se kush jam  
Kukull në vitrinë  
Ose njeriu që s'e di emrin e vet  
Unë e njoh vetëm heshtjen

Çfarë rëndësie ka emri  
Kur ne të gjithë vuajmë nga skleroza  
I kemi harruar rrënjët e ekzistencës  
Dhe u përngjajmë  
Fundit të tunelit pa dritë

I mbushim xhepat me gjethe të verbëta  
Si zëri endacak i natës  
Bien për toke degët e thara të vjeshtës  
Dimri po hynë  
Nëpër dejtë e mendjes së shthurur

Kjo ngricë e përkohshme  
Më duket se po bashkëjeton  
Me kallkanët  
Nën degët e manit të ngarkuar  
Me trishtim  
Si e keqja fshihet një dimër i mbrapshtë

*Prishtinë, 23 dhjetor 2013*

## MURET E LAGËSHTA TË KUJTESËS

Sot shkruajmë letra njëri - tjetrit  
Letra pa ngjyrë  
Që u ngjajnë fjalëve të zbrazëta  
Me zarfe prej mjegulle  
Sa herë që prekim tastierën e kallkantë  
Na sëmbojnë thellë në shpirt  
Tingujt elektronik të natës

Mbase një zbrazëti e tejdukshme  
Rri ulur në mendjen tonë  
Dhe me gishtat e saja skelet  
I prek pa ndjenja  
Muret e lagështa të kujtesës

Dikur shkruanim letra me zemër  
Kurse sot fjalët i dërgojmë nëpër largësi  
Që vuajnë nga anemia  
Mbase edhe të lënduara  
Të përziera me shpirtra të plumbta  
Fjalë prej akulli të kristaltë  
Që nuk zënë vend në asnjë frymë njeriu

## VARRI

Paska mbetur lakuriq druri i jetës  
Kanë rënë edhe gjethet e fundit  
Një mëngjes si ky  
I kësaj vjeshte  
Mos e përjetoftë më agullimën

Ne ecëm si dreri i egër ecëm  
Deri te vau dhe përtej burimit  
Nata ishte ngarkuar me yje  
Sa që shkundej  
Si degët e mollës së pjekur

Askund asnjë fjalë prej shiu  
Nuk ngjan të këndojmë me meteorët  
Disa kometa të pikëlluar  
Si qyqet e zeza  
Dënesnin mbi një varr të panjohur

Asnjeri nuk di  
Se kujt i takon ky varr  
Mos është i ndonjë ushtari  
Ose të ndonjë profeti anonim  
Mbase edhe i prostitutës  
Këtu dita i përngjan  
Enigmës së një kryqi të humbur

Paskan mbetur lakuriq edhe gurtë  
Ky mermer i kuq i Kosovës  
Që rri mendueshëm këtu  
Kush e di  
Se për cilin njeri e sollën  
Nga atdheu i grimcuar i zogjve

## SA HERË QË TËRBOHET

Bredhim mes një zhurme shurdhuese  
Nëpër stërkalat e shiut të xhamtë  
Bien si gjethet e vonuara  
Po bien stinët

Fëmijët kanë zënë të rriten  
Adoleshenca  
U ngjan kuajve të erës  
Duke pirë ujë me mëgojëza të arta  
I këpusin dizgjinët e mjegullave

Era këtu ka një pamje  
Që s'krahasohet  
Me asnjë lule të egër  
Herë ngjan të ecën vertikalisht  
E herë  
Horizontalisht kalon nëpër labirinte

Në çastin kur nuk mundet me e ndal vrapin  
Hingëllon si kali i paçjerrë  
Në frymën e tij flenë  
Perënditë e erërave  
Sa herë që tërbohet i përngjan Eolit

## VALIXHET

Nëpër skutat e harruara  
Dhe të papastra të stacioneve  
Mes gazetave të hedhura  
Flenë valixhet prej kartoni  
Që u përngjajnë  
Njerëzve të vetmuar të mëngjeseve

Ka edhe të atillë të drunjta  
Me shije arre  
Vijnë nga shekulli i shkuar  
Të stërm bushura me shiringa  
Nëpër stolat e papastra  
Nga nikotina e verdhë  
Avullon një shije e mykur duhani

As ora e murit nuk është e saktë  
Këtu çdo herë trenat vonohen  
Ose me ditë të tëra s' dëgjohet fërshëllima  
E egër e mëngjesit

Një qen bredhës për çdo ditë  
Nëpër qeskat e shqyera të najlonit  
E gjen bukën e vetë të përditshme  
Që kundërmon  
Si hudhra të prishtë në pranverë

## NOTON ME DALLGËT E ËNDRRËS

Kur netët nuk janë të qeta  
Nga një gjumë i përdalë  
Përplot trishtim njerëzor  
Zgjohen ankthet

Hijet e vrara nëpër dhomë  
Ecin si makthet  
Me ingranazhe të trishtuara shkelin  
Mbi çatitë e rrënuara të shpirtit

Të brendshmet dhe jashtëqitjet  
E jorganit bëhen copë e grimë  
Jastëku si një varkë e thyer  
Noton me dallgët e ëndrrës

Mbi shkumën e trishtuar  
Të dyshekut  
Ngjanë përmytja e përgjumjes  
Nga djersitja e mureve sëmuret dyshemeja

Nata si nëpër një ëndërr të keqe  
Kalon rrugëve  
Me hapa të lodhura  
Deri te kryqi ecin edhe njerëzit

Dhoma ime e gjumit  
Si përherë ofshanë  
Zëri im në një skutë të harruar  
Lexon ditarin e një kohe të grisur

## **DIELLI I HARLISUR SI ERA**

Megjithatë  
Sonte s'është koha të mbyllen dritaret  
Ne i hapëm fjalët  
Ashtu siç hapen petalet  
E luleshtrydhes së egër

Për herë të parë  
Deshëm të mësojmë nga bleta  
Sekretin  
Të vetmen mjeshtri  
Se si e nxjerrë mjaltin  
Nga shpirti i virgjër i lules

Një hënë e re adoleshente  
Pak më ndryshe  
Mbase as nuk i ngjanë  
Asaj ekzistuese  
Ka zënë të lëshoj rrënjë adventive  
Në mendjet e njerëzve

Dielli i harlisur si era  
Në krifat e thinjura të kuajve  
Nuk e ndalë galopin e arritjes së qëllimit  
Sa që potkonjtë e argjend  
Nxjerrin xixa zjarresh

## SHIU I ZI STERRË

Këtu koha ndryshon  
Ose asnjëherë nuk ndryshojnë gjërat  
Njerëzit nuk mbajë kapela  
Thonë se kokat e këtyre banorëve  
Nuk i durojnë kapelat  
Por arsyen askush nuk e di  
Ose nuk e tregon

Përherë këtu bie shi  
Në zërin e erës lagen kujtimet  
Piskamat dëgjohen shumë radhë  
Ose s'dëgjohen asnjëherë

Secili i kontrollon mendimet e të tjerëve  
Derisa egoja e tyre  
Ngarend me ideja të shthurura  
Dhe shiu nuk pushon

Nëse shkojmë në atdheun e gjyshërve  
Vështir se mund të përbirohemi  
T'i hapim dyert e mbyllura  
Të parët tanë i kanë harruar mirësjelljet  
As nuk të presin para dyerve  
E as nuk të përcjellin

*Prishtinë, 24 dhjetor 2013*

2.

Në cilin do çoftë varr  
I lëshojmë lulet e Plastikës dhe largohemi  
Nuk lexojmë asnjë lutje  
Sepse shurdhmemecët s'dëgjojnë

I mbyllim dyert e thyera  
Dhe ua kthejmë shpinën kohës  
Që na tradhtoi  
Sërish shiu nuk ndalet  
Pa reshtur bie në lotin e gurit të hidhur

Përpos britmave të pa koordinuara  
Nuk dëgjohet asnjë zë njeriu  
E shiu i vjeshtës  
Nuk ndalet në këtë dimër  
Bie  
Pa reshtur po bie  
Prej kallkanëve të kujtesës

3.

Mbi lëkurën e njomë të barit  
Po bie një shi i prushtë  
Te dyert e varreve askush s'troket  
Një dunë prej hiri  
Dënes mbi një gur të murrmë

Një degë e tharë mështekne  
Rri ulur kacule  
Dhe vajton mbi një varr  
Vajton tok me gjethet e njoma  
Të gështenjës  
Asnjeri nuk kaloi këndeje pari  
Vetëm fryma e vetmisë  
Bredh si fantazma e Hamletit

Ka kohë që po bie ky shi i çmendur  
E s'ndalet  
Duke riguar trishtim  
Mbi flokët e erës  
Si në shpirtin e një ëndrre  
Pikojnë retë  
Qielli ka zbritur aq poshtë  
Sa që e prekim me dorë  
Shiu i zi sterrë s'pushon mbi kokën time

## DËSHIRAT

Ndoshta jam çmendur  
Kurrë nuk mund t'i njoh dëshirat e mia  
Orë e çast ndryshojnë  
Nga njëra - tjetra  
Secila u përngjanë njerëzve labil

Herë janë të buta me një dozë dashurie  
E herë të ashpra  
Si shpirtrat e këtyre maleve  
Kur ngarkohen  
Me shirat e urrejtjes

Ecën rrugëve pashpresë  
Nëpër çdo ëndërr fusin kokën  
S'lagen nga rrebeshet e shirave  
Ecën deri në pambarim  
Dëshirat e mia të paplotësuara

## DRUR I PIKËLLUAR

Stina e acartë  
Trotuaret me duar të ngrirë  
Si qirinjtë e akullt lëshohen kallkanët  
Ca shpirtra të thyer kristali  
Pa shpresë bredhin shëtitoreve

Gjumi fshihet nëpër zgërbonjat e fjalëve  
Heshtja ka marr udhë  
Dhe vrapon xhadesë së ngrirë  
Një arabaxhi i moshuar  
Kotet mu si kjo natë e acartë

Kuajt e mi të mirë i numërojnë hapat  
Ecin nëpër lodhjen e sterrës së plagosur  
Një qyqe e bardhë sonte  
Për herë të parë  
Vajton mbi një degë të dyshimtë

Kurse kuajt e lazdruar  
I krehin krifat e thinjura të natës  
E nata ngarkuar me trishtim  
As që i ka mbyllur sytë  
Sonte nuk fle askush  
Druri i pikëlluar vajton tok me qyqen

## DELTE VETËM NJËHERË NË DITË

Mbështete kokën  
Mbi supin tim të dërmuar  
Nëse do qaj sonte deri në mëngjes  
E di se vaji yt  
I përngjan vajit të zogjve  
Kur qajnë mbi vezët e dështuara

Shiko e dashur shiko  
Se si qan edhe kjo hënë  
E varur për degët  
E thyera të mjegullave  
Qan  
Mbase sonte do vallëzoj  
Për herë të fundit  
Tangon e fëmijërisë  
Të cilën kurrë nuk e harroi

Po bie shi  
Pa ndërprerë po bie  
Mbi flokët e shprishura të mjegullave

Të kujtohet ylberi  
Kur te kodra e diellit  
Delte vetëm njëherë në ditë  
Kurse herëve të tjera fundosej  
Si Titaniku në detin e dallgëve të pashpirt

## **KA MBETUR NË NJË ËNDËRR**

E tërë e kaluara ime  
Ka mbetur në ëndërr  
Ka mbetur  
Si një peng që nuk të lë rehat  
I cili në çdo kohë të ngacmon  
Dhe s'të lëshon të ecësh përpara

Të rri në qafë si një gur sinori  
Ta largosh nuk guxon  
Janë disa kode  
Nga të cilët nuk mund të ikësh  
Je i detyruar ta bartësh si kryqin  
Ky lloj pengu  
Peshon më shumë se çdo jetë

Sa herë që i fshehim duart prej vetvetes  
Ngjanë që të ecim si drurët  
Asnjë njeri nuk bisedon  
Për të kaluarën  
Kurse e ardhmja  
As që duket në horizont  
Fshihet si e vërteta pas shpinës  
Së mëkatit të parë të njeriut

*Prishtinë, 25 dhjetor 2013*

*Unë vij tek ti qyteti im*  
*Cikli i tretë*



## JANË DELIKATE

Sot është fare lehtë  
Dhe krejtësisht ndryshe  
Shumë më ndryshe se në kohërat tona  
Sepse miqtë e mi  
Mund të blejnë ndonjë kukull  
Në cilën do vitrinë të qytetit

Ka edhe të tilla që ruhen nëpër valixhe  
Dhe sa herë u teket kodoshëve të sotëm  
I frynë me disa mjete të sofistikuara  
Siç ne në fëmijërinë tonë  
Që i fryfshim gomat e biçikletave

Të dashurat e ditëve të sotme  
Sipas dëshirës herë shfryhen  
E herë fryhen me pompa plastike  
Janë tejet delikate  
U përngjajnë poqëve elektrike

Edhe gjumin e bëjnë në ndonjë sirtar  
Jetojnë të mbuluara  
Me pluhurin e kohës  
Për nga kërkesat janë shumë modeste  
Me muaj të tëra gjallërojnë  
Nën mbretërinë e drynit të ndryshkur

## **NUK MUNGOJNË AS KËMISHËT**

Njerëzit e qytetit tim  
Sot vishen me modën e fundit  
Netëve të vona  
Kohën e kalojnë nëpër varre  
Deri në asht  
I zhveshin të vdekurit

Kanë aq shumë palë këpucë  
Sa që shesin nëpër tregje  
Me një çmim qesharak  
Nuk mungojnë as këmishët  
Për të gjitha moshat  
Kanë edhe pantallona me shumicë

Tek këta matrapaz gjen kollare  
Për çdo stinë  
Dhe që i përshtaten çdo lloj veshjeje  
Sa herë që i zhveshin të vdekurit  
Po aq herë  
I veshin me të mbathurat e tyre personale

## SI NJË SKILE E EGËR BIZANTINE

Pandërprerë dhe në çdo kohë  
Ëndërojmë engjëjt  
Ëndërojmë se pse këmisha e jonë  
I përngjan lëkurës së regjur të djallit  
Marrim frymë  
Si peshqit e konservuar

Nëpër bulevarde dhe shëtitore  
Ecim si kuajt e verbër  
Nuk ndalemi në asnjë stacion  
Në parakalimin tonë  
Si nëpër ndonjë teatër antik  
I shtrimë duart kah e kaluara

Një zbrazëti e padëgjuar  
Del nga arka e Pandorës  
Ethshëm shikon të shkuarën

Nën urat e Lumëbardhit  
Si një skile e egër bizantine  
Me një sekret të padukshëm  
Ka zënë ta ngrehi kokën  
Si cerberi i egër

## **VETËM NJË LIS I VETMUAR**

Sa herë që zemërohen furtunat  
Në tokën tonë  
Bie rrebesh i rreptë shiu  
Bien edhe gjethet e një stine  
Si trishtimet bien perëndit

Asnjeri nuk mbeti në këmbë  
Po ikin zvarranikët  
Në të katër anët e botës  
Po largohen zogjtë  
Kush do të mbetet me i rregullua varret

Një hije e lënduar po qanë si fëmijë  
Mështekna e etur i shkund degët  
Trishtueshëm jehon murrani  
Si një zog i braktisur  
Dënes varrtari i moshuar

Askush nuk paska mbetur  
Pranë kësaj dune prej hiri  
Vetëm një lis i vetmuar  
I shkund degët e thata  
Një peshë e rënd dimri  
Rri mbi shpatullat e çatisë së rrënuar

## DESHËN

Deshën të më hipin  
Në varkën e Noes  
Kategorikisht refuzova  
Unë nuk shkoj askund  
Pa kryqin tim pagan

Kush jeni ju  
Të më urdhëroni  
Se çfarë të bëjë  
Kur fisi im e njihte kryqin  
Ju keni fryrë në brirë dreri

Ecni udhës së juaj  
Shkoni ku të doni  
O njerëz të mirë  
Unë pa identitetin tim  
S'lëvizi dot asnjë hap

Deshën të pabesët  
Çfarë s'deshën të bëjnë me mua  
Por unë eca vertikalisht  
Ashtu siç ecte krenar  
Atdheu im  
Në kohët e idhujve  
Kur vdiqën Zotat e Olimp

## VASHAT PREJ PLASTIKE

Ndoshta tani është koha  
Kur duhet të jemi të singertë  
T'i heqim maskat  
Nga fytyrat e hijeve

Të ecim me dashnoret tona  
Pa komplekse  
T'i nxjerrim nga vitrinat e papastra  
Të brendshmet e natës

Nuk është turp të ballafaqohemi  
Me egon tonë të sëmurë  
Secili prej nesh  
Është i ngarkuar me mëkatën e vet

Dhe me nga një përmendore  
Lakuriqe në shpirt  
Sepse shpirtin e kemi të zhveshur  
Deri në asht

Kalojmë rrugëve lakuripe  
Ndjenja e jonë  
Proteston në heshtje

Kur zbresim në tokë  
Si shirat e liga  
I varim sytë megjullave  
Nëpër vitrina kukullash  
Ku shiten me çmime marramendëse  
Vashat prej plastike me shije blu

*Prishtinë, 26 dhjetor 2013*

## MENDIMET

Mendimet janë si kafkujt  
Të zbrazëta  
Të tëra boshe  
Nga çdo anë marrin frymë  
Kur hasin në ndonjë degë të përshtatshëm  
Këndojnë si zogjtë e verbër

Mes njerëzve u përngjajnë turtujve  
Kur s'kanë se çka me hëngër  
Në vetëdijen e tyre bluajnë gurin e kuq  
Dhe në të shumtën e rasteve  
Ecin me kukëza  
Ose i mbështeten xhamit të thyer të kujtesës

Kur rrinë pranë njerëzve  
Një këmbë e mbajnë për ecje  
Kurse këmbën tjetër për ikje  
Sepse asnjëherë  
Nuk ndalen të mendojnë esëll

Kështu e kanë pasur përherë  
E kanë edhe sot  
Jetojnë mes kafkujve të boshatisur  
Si njerëzit  
Me shpresa të humbura

**ÇDO STINË  
ËSHTË E BUKUR NË PRIZREN**

Në behar si ujëvarë zbresin zambakët  
Gocat dashurojnë pa mend  
Lumëbardhi si dhëndër që s'plaket  
Çdo stinë është e bukur në Prizren

Vera na vjen me afsh e begati  
Të mirat i sjellë nga çdo vend  
Lulja lules këtu s'i mbanë zili  
Çdo stinë është e bukur në Prizren

Kur gjethet i derdhin ngjyrat e arta  
Vashat punojnë në avlëmend  
Dhe na shikojnë me sytë e zjarrtë  
Çdo stinë është e bukur në Prizren

Kur dimri zbret me mjekrën dëborë  
Oxhaqet tymojnë tërë gëzim e shend  
Të dashuruarve u thurë nga një kurorë  
Çdo stinë është e bukur në Prizren

## MËKATI

Mëkati është  
Buka e jonë e përditshme  
Me ose pavetëdije gëlltisim  
Tek e fundit jemi njerëz

Pasi që mëkatoi Ademi  
Pse të kursehemi ne nga mëkatet  
Si mund të jetë njeriu kaq anemik  
Kur në afërsi të tij  
Ajo merë frymë si era lakuriqe

Një mëkat më shumë ose më pak  
S'do të thotë asgjë  
Në fijet e flokëve të thinjura  
Kjo kafshatë e zakonshme  
Ka hyrë si ajri në qenien tonë

Nën plepat e moshuar  
Mëkatojnë edhe zogjtë e egër  
Mëkaton edhe i shenjtë  
Kur e mbytë djallin  
Prej mëkatit në mëkat  
Ecim në përditshmërinë tonë

## AQ SHUMË U BESOJ DALLGËVE

Po që se nuk më gjeni si përherë  
Te stoli im në parkun e vjetër  
Dijeni se  
S'do të më gjeni askund më  
Unë udhëtoj  
Përherë jam në udhëtim e sipër

Nuk dua kurrsesi s'dua  
T'i përngjaj gurit të sinorit  
Jam i papeshë  
Mund të më krahasoni  
Me gjethet e blirit  
Fluturoj në krah zogjsh

Oqeanet janë të vegjël  
Më të vegjël se një trishtil i vetmuar  
Aq shumë u besoj dallgëve  
Sa që më duken  
Si flatrat e ëndrrave të mia

Andaj miqtë e mi  
Mos më kërkoni askund  
Udhëtimet tek sa kanë filluar në mua  
Kur të mbërri ta njoh egon time  
Do ju tregoj se sa i përngjaj vetvetes

## PREJ NJË SHEKULLI NË TJETRIN

Në këtë qytet mistik  
Vetëm gurtë janë të gjallë  
Më shikojnë me një lakmi të paparë  
Sa me dëshpërim i caktojnë sinorët  
Këta banor prej eshtrave

Në të shumtën e rasteve heshtin si varri  
Asnjë zë njeriu s'dëgjohej  
Shpirtrat e gurëve  
U përngjajnë deleve në kullosa  
Por askurrë nuk dëgjohej  
Blegërima delesh

Në këtë qytet  
Të gjyshërve të mi mitik  
I kemi matur rrugët me pallamar trishtimi  
Prej një shekulli në tjetrin  
Kemi marshuar me eshtra të balsamosura

Askush nuk është në gjendje të shpjegoj  
Por këtu dëgjohej piskamat e njerëzve  
Edhe kur dënesin gurtë e sinorëve  
Ky lloj vaji i trishtë  
U përngjan këngëve majëkrahut

*Prishtinë, 27 dhjetor 2013*

## UNË VIJ TEK TI QYTETI IM

Unë vij tek ty qyteti im  
Vij me shirat  
Mbi krah zogjsh kthehem  
Kam tepër mall për durimin e kalasë  
Dhe gjëmën e Lumëbardhit

Vij për ta shuar etjen e mallit  
Zogjtë e mi të verbër përherë fluturojnë  
Nëpër qiellin e vrarë të kujtimeve  
Unë vij tek ty qyteti im  
Vij të çmallem  
Me kalldrëmet shqiptare

Nëse nuk kam tjetër mundësi  
I shaloj ëndrrat e mia  
Që me vite të tëra hingëllojnë  
Por unë gjithsesi do vij një ditë  
Me buqeta të freskëta lulësh  
Do i vizitoj varrezat

I kam shkruar edhe disa epitafe  
Për gurtë e varreve të panjohura  
Unë do të vij një ditë te ty  
E di Prizreni im se ti më pret  
Ndoshta si dhjakonar mbase edhe si poet

## SA PËR KURESHTJE

Ikën edhe miqtë e mi  
Kanë mbetur vetëm pragjet e gurta  
Që më presin në këtë moshë  
Asnjë trishtil i trishtuar  
Nuk kërcen më prej një dege  
Në tjetrën

Ngjanë që këtu  
Të vonohen edhe pranverat  
Shirat nuk kaluan këndeje pari  
Në mjerimin e stacionit të trenit  
Pashë vetëm ca valixhe prej kartoni

Udhëtarët ishin të dehidruar  
Kishin ca pamje anemike  
Të lekosur edhe qeshja e tyre  
I përngjante vajit  
Në zërat e përmbytur këndonte qyqja

Sa për kureshtje  
Morra një zambak të tejdukshëm  
Asgjë si në fëmijërinë time  
Ishin tretur diku ngjyrat e bardha  
Kishte mbetur vetëm pakë hije  
Mes guralecëve të fëmijërisë

## MUNGON DIÇKA E PAQARTË

Gjërat nuk janë të përkryera  
Në çdo përsosmëri  
Mungon diçka e paqartë  
Ja shikoje syrin e djathtë  
Të Mona Lizës  
Se si loton  
Nga një sëmundje e panjohur

Shakullina në këtë tablo arkaike  
Po i përngjan shpirtit kryengritës  
Të poetit endacak  
Kalorësit mbrëmë ikën  
Ikën  
Mbi syprinat e dendura të mjegullave

Edhe këto stërkala shiu  
Sot po duken  
Më shumë artificiale se sa të natyrshme

Kallkanët nën çatinë e vetëdijes  
Po u përngjajnë qirinjve  
Që ndizen në heshtje  
Por asnjëherë nuk përfundon  
Mesha e panisur  
E premtës së madhe

Gjërat nuk janë të njëjta  
Si ato mbi ujë  
Po ashtu edhe në fund të ujit  
Ato ndryshojnë pamjen  
Dhe mënyrën e ekzistencës  
Çdo gjë varet nga rrymimi  
I dallgëve të shthurura të jetës

## MËSUAM NGA INSTINKTI

Kur e fshehim përgjumjen  
Nga mjegulla e ëndrrave  
Zgjohen makthet  
Trishtimi ua lëshon vendin anktheve

Qeshjet i kem të pakoordinuara  
U përngjajmë ditëve të mërzitshme  
Nga lodhja e jonë  
Shtrydhim mëkatin e britmës  
Megjithatë  
Për asgjë nuk ndjejmë keqardhje

Ndoshta jemi regjur si lëkura e buallit  
Gjërat e këqija  
Po ashtu edhe ato të mira  
Nuk na lënë asnjë përshtypje  
Në jetën tonë të drurët  
Fjetëm me gjethet

Nuk na kujtohen pranverat  
Përherë kemi jetuar mes vjeshtës  
Dhe dimrit kështu që kur kishim etje  
Mësuam nga instinkti  
Se si të gjejmë ujë  
Në syrin e kaltër të gurit të murrmë

## DYERT E TË GJITHA FJALËVE

Ne i dëgjojmë zërat e shiut  
Zërat që bien mbi një darabukë kujtimesh  
Atë ditë frynte jugu  
Era si e çmendur kalonte  
Nën rrënjët e lisave

Mana e egër në oborrin tonë  
Ishte rritur aq shumë sa që bënte hije  
Edhe në oborrin e fqinjëve ardhacak  
E atyre u pengonte  
Çdo gjë u pengonte që vinte nga ne

Besa edhe neve të gjithëve  
Na pengonin sjelljet e tyre banale  
Na dukeshin të çuditshëm  
Krijesa pa shije  
Dhe pa identitet njerëzor  
Edhe kur bënin kryq shanin Zotin

Pamë se me kesi lloj tipash  
Nuk mund të bisedonim  
Andaj me kohë i mbyllëm  
Dyert e të gjitha fjalëve  
Dhe filluam të ecim  
Secili nëpër udhën e vet

## NUK TË MËRDHINË GISHTRINJTË

S'do të doja t'i ndërrojmë vendet  
Ani që hiq më pak se ty  
Nuk më përcjellin të mirat  
Ti i ke përfunduar punët e vjeshtës  
Kurse mua më presin ato të dimrit

Ky dimër i gjatë po më rri mbi kokë  
Po më rri  
Si kallkanët e egër në degët e çative  
Furtuna nga çdo anë  
Po frynë në qenien time  
Kurse ti e ke më mirë  
Mbështjellë me atë copë qefini

Nuk të mërdhinë gishtërinjtë  
As nofullat nuk trokasin  
Si vrapi i kalit të egër  
Ky dimër mbase ka ardhur shumë herët  
Na ka zënë pa dru e pa bukë

Ty nuk të duhen këto gjëra të përditshme  
Thonë se  
Në Parajsë ke gjëra me bollëk  
Por prapë se prapë  
Mua më ngrohin kallkanët  
S'do të doja t'i ndërrojmë vendet

## SI NËPËR NJË ËNDËRR

Si nëpër një ëndërr me përplot ankthe  
Eci rrugëve të qytetit  
Pas meje vijnë plepat dhe nuset  
Që u përngajnë zogjve

Vijnë edhe njerëzit  
Si do hije të trishtuara  
Vijnë  
Dhe s'kanë të ndalur ulërimat

Një qyqe e vetmuar  
Vite me radhë  
Vajton në brigjet e Drinit  
Vajton të vetmin vëlla të murosur në gur

Një elegji sa epike  
Po aq edhe madhështore  
Lëshon rrënjë në brigjet e lotëve  
Nga syri i një cope mjegulle  
Si rrëke derdhet dita

Kurse Drini i Bardhë  
Kalon i vetmuar brigjeve  
Si një mbret pas abdikimit  
Kalon me flokë të shprishur

Në zërin e erës bie shi i prushtë  
Po shkunden edhe yjet  
Me tërë fuçinë e qiellit  
Po shkunden mjegullat  
Si nëpër një ëndërr të largët  
Dëgjohen trokëllimat e kuajve të ujit

*Prishtinë, 28 dhjetor 2013*

## SHËNIME BIOGRAFIKE PËR AUTORIN

**Adem Zaplluzha** u lind në Prizren, më 1943. Shkollën fillore dhe të mesme i kreu në vendlindje, ndërsa Akademinë Pedagogjike në Prishtinë. Një kohë punoi si mësues nëpër fshatrat Studençan të Therandës (ish Suharekës) dhe Hoça e qytetit, afër Prizrenit. Ndërkohë punësohet si përkthyes në Korporatën Energjetike të Kosovës. Me shkrime filloi të merret kryesisht me poezi që nga mosha e fëmijërisë. Rrugën letrare e nisi me vjershën e parë për fëmijë të cilën e botoi në revistën “Pionieri”, më 1957. Si i punësuar në Korporatën Energjetike të Kosovës bashkë me shokët e punës dhe pendës themeloi grupin letrar “Lulëkuqet e Kosovës”. Në Kuadër të punës së këtij grupi letrar qe botuar përmbledhja “Ngjyra e kohës”, në të cilën u përfshi një numër i konsideruar i poezive të tij. Krahas krijimeve të publikuara në revistat për fëmijë, botoi edhe një serë shkrimesh nëpër gazetatat e kohës që dilnin në Prishtinë dhe Shkup. Është anëtar i Lidhjes së shkrimtarëve të Kosovës, prezent në disa antologji dhe në librin Kosova letrare të poeteshës Monica Mureshan. Është prezantuar në *Leksikonin e Shkrimtarëve Shqiptarë 1501-1990*, nga Hasan Hasani, në *Leksikonin Shkrimtarët Shqiptarë për fëmijë 1872 - 1995* nga Odhise K. Grillo, si dhe në

librin *Portrete Shkrimtarësh* nga Demir Behluli, Prishtinë, 2002 Në maj të vitit 2013 Klubi i Artistëve dhe i shkrimtarëve të Durrësit ia ndau çmimin e karrierës për kontributin e dhënë në letrat shqipe. Jeton dhe krijon në Prishtinë ndërsa aktivitetin letrar e zhvillon në kuadrin e Klubit letrar “Fahri Fazliu”, në Kastriot.

## **BOTIME TË AUTORIT**

1. “Puthje”, poezi, “Rilindja”, Prishtinë, 1974.
2. “Ecjet e viteve të mëdha”, poezi, “Jeta e Re”, Prishtinë 1995.
3. “Çamarrokët e Thepores”, poezi për fëmijë, “Shkëndija”, Prishtinë 1996.
4. “Muret”, poezi, “Jeta e Re”, Prishtinë, 1997.
5. “Morfologjia e dhembjes”, poezi, “Faik Konica”, Prishtinë, 2000
6. “Ai vjen nesër”, poezi, Qendra e Kulturës, Klubi letrar “Fahri Fazliu”, Kastriot, 2007
7. “Letër nga mërgimi”, poezi, Klubi letrar “Fahri Fazliu” Kastriot , 2007
8. “Letër nga mërgimi 2 “ poezi, “Qendra e Kulturës”, Klubi letrar , “Fahri Fazliu”, Kastriot 2007
9. “Udhëndarja”, poezi, “Qendra e Kulturës”, Klubi letrar , “Fahri Fazliu”, Kastriot , 2008
10. “Thirrje e gjakut”, poezi, “Qendra e Kulturës”, Klubi letrar, “Fahri Fazliu” Kastriot 2008
11. “Asgjë sikur molla”, poezi, “Qendra e Kulturës”, Klubi letrar “Fahri Fazliu”, Kastriot, 2009.
12. “Vesa në lotin tim”, poezi, “Qendra e Kulturës”, Klubi letrar “Fahri Fazliu”, 2009,
13. “Puthja e gozhduar”, poezi, “Qendra e Kulturës”, Klubi letrar, “Fahri Fazliu”, Kastriot , 2009.
14. “Kashelasha në vargje”, poezi për fëmijë,” Qendra e kulturës, Kastriot, 2009.
15. “Pema e bekuar”, E përkthyer, Rumani, 2010.

16. "Bajraktarët e vatanit", poezi satirike, Klubi letrar, "Fahri Fazliu" Kastriot, 2010.
17. "Hijet e ndryshkura", poezi, "Qendra e kulturës", Kastriot, 2010.
18. "Stuhi në Kutulishte", poezi, "Qendra e kulturës", Kastriot, 2010.
19. "Posa ikte nata", poezi, "Qendra e kulturës", Kastriot, 2010.
20. "Loja e myshqeve", poezi, "Qendra e kulturës", Kastriot, 2010.
21. "Lumëbardhi dhe gjëma", poezi, "Qendra e kulturës", Kastriot, 2010
22. "Metafora e heshtjes", poezi, "Qendra e kulturës", Kastriot, 2010
23. "Hyji në Prekaz", poezi, "Qendra e Kulturës", Kastriot, 2010.
24. "Sinorët e hinores", poezi, Shoqata e Shkrimtarëve-Kastriot 2010
25. "Don Kishoti dhe Rosinanti", poezi, Shoqata e Shkrimtarëve, Kastriot, 2010
26. "Zjarri i dashurisë", poezi, Shoqata e Shkrimtarëve-Kastriot, 2010
27. "Kur likenet vallëzojnë", poezi, Shoqata e shkrimtarëve-Kastriot, 2010
28. "Ditari në vargje", poezi, Shoqata e Shkrimtarëve-Kastriot, 2010
29. "Tingujt që nuk përfundojnë", poezi, Shoqata e shkrimtarëve –Kastriot, 2010.
30. "Shtegu i mallit", poezi, Shoqata e shkrimtarëve-Kastriot, 2010
31. "Korniza e thyer", Poezi, Shoqata e shkrimtarëve, -Kastriot, 2010

32. “Zgjimi i gjëmës”, Poezi, Shoqata e Shkrimtarëve-Kastriot, 2010
33. “Vallja mistike”, Poezi, Shoqata e Shkrimtarëve-Kastriot, 2010
34. ”Merre kodin”, Poezi për fëmijë, Shoqata e shkrimtarëve Kastriot, 2011
35. “ Letër atdheut” poezi, Shoqata e Shkrimtarëve-Kastriot, 2011
36. “ Tejudkshmëria e shiut”, Poezi, Shoqata e Shkrimtarëve- Kastriot, 2011
37. “ Përtej teje”, poezi, Shoqata e Shkrimtarëve-Kastriot, 2011
38. “Sa afër e sa larg” , poezi, Shoqata e shkrimtarëve-Kastriot, 2011
39. “Vallja e zanoreve”, Poezi , Shoqata e Shkrimtarëve- Kastriot, 2011
40. “Ikja e eshtrave”, Poezi për të rritur, Shoqata e Shkrimtarëve- Kastriot, 2011
- 41.”Kalorësit e mjegullave”, Poezi, Shoqata e shkrimtarëve-Kastriot, 2012
42. “Hingëllimat e shiut”, Poezi, Shoqata e Shkrimtarëve- Kastriot 2012
43. “Kur pemët i ndërrojnë këmbishët”. Poezi, Shoqata e Shkrimtarëve- Kastriot, 2012
44. “Mirëmëngjes Imzot”, Poezi, Shoqata e shkrimtarëve – Kastriot, 2012
45. “Kafshimi i mikut”, Poezi satirike, Shoqata e Shkrimtarëve- Kastriot, 2012
46. “Atje tej maleve”, Poezi, Shoqata e shkrimtarëve , Kastriot-2012
47. “Heshtja që del në shesh,” Poezi, Shoqata e Shkrimtarëve, Kastriot -2012

48. “Portat e shpresës”, Poezi, Shoqata e shkrimtarëve, Kastriot-2012
49. “Në dhomën time gjysmë të errët”, Poezi, Shoqata e Shkrimtarëve- Kastriot, 2012
50. “Kinse Lojë Shahu”, Poezi, Shoqata e Shkrimtarëve- Kastriot, 2012
51. “ Për çdo dekadë nga një baladë “, Poezi, Shoqata e Shkrimtarëve – Kastriot, 2012
52. “Fusha e mëllenjave”, Poezi, Shoqata e shkrimtarëve- Kastriot, 2012
53. “E kujt është kjo vetmi”, Poezi, Shoqate e Shkrimtarëve- Kastriot, 2012
54. “Mos pyet për adresën e lumit”, Poezi, Shoqata e Shkrimtarëve – Kastriot, 2012
55. “ Stoli në parkun vjetër” Poezi, Shoqata e Shkrimtarëve- Kastriot, 2012
56. “Urori i stralltë”, poezi, Shoqata e shkrimtarëve –Kastriot, 2012
57. “Po të mos ishte fjala”, Poezi, Shoqata e shkrimtarëve- Kastriot,2012
58. “Thyerja e urave”, poezi, Shoqata e shkrimtarëve –Kastriot, 2012
59. “ Trokëllimat në gjumin e dallgëve”, Poezi, Shoqata e Shkrimtarëve- Kastriot, 2012
60. “ Në flokët e dëborës”, poezi, Shoqata e Shkrimtarëve –Kastriot, 2012
61. “Një grusht nostalgji”, Poezi, Shoqata e Shkrimtarëve-Kastriot, 2012
62. “ Kur filluan të flasin njerëzit”, poezi, Shoqata e shkrimtarëve- Kastriot, 2012
63. “Kur stinët kapërcejnë fshehurazi”, poezi, Shoqata e Shkrimtarëve – Kastriot,2012

64. “ Lisi në rrënjët e veta” , Poezi, Shoqata e Shkrimtarëve –Kastriot 2012
65. “Eca ecëm dhe do ecim”, Poezi, Shoqata e Shkrimtarëve – Kastriot, 2012
66. “Fëmijët e erës”, Poezi, Shoqata e shkrimtarëve-Kastriot 2012
67. “ Çast në fund të stinës”, Poezi, Shoqata e Shkrimtarëve- Kastriot-2012
68. “Si të flas me drurët”, Poezi, Shoqata e Shkrimtarëve-Kastriot, 2012
69. “ Më pëlqejnë mendimet e tua”, Poezi, Shoqata e Shkrimtarëve- Kastriot , 2012
70. ”Andej dhe këndej kohës”, poezi, Shoqata e Shkrimtarëve- Kastriot , 2012
71. “Zëri i heshtjes”, poezi, Shoqata e Shkrimtarëve-Kastriot, 2012
72. “Kush i lexoi letrat prej erës”, poezi, Shoqata e Shkrimtarëve-Kastriot, 2012
73. “ Fluturimi i korbave në netët pa hënë”, prozë poetike, Shoqata e Shkrimtarëve –Kastriot, 2012
74. “Koha e ime dhe koha e jote”, Poezi, Shoqata e Shkrimtarëve-Kastriot , 2012
- 75.” Diku te një baladë”, Poezi, Shoqate e Shkrimtarëve –Kastriot, 2012
76. “ Sonte çdo gjë po i përngjan lotëve”,Poezi, Shoqata e Shkrimtarëve –Kastriot, 2012
- 77 “ Ky def prej hëne”, Poezi, Shoqata e Shkrimtarëve-Kastriot, 2012
- 78.“Pyesni zogjtë në ikje ”,Poezi , Shtëpia botuese “Fahri Fazliu”- Kastriot 2013
- 79 “ Fërfërimë gjethesh”, Poezi, Shtëpia botuese “Fahri Fazliu”, Kastriot- 2013

80. “Refrene yjesh”, Poezi, Shtëpia botuese “Fahri Fazliu”- Kastriot, 2013
81. “Te delta e mjellmave”, Poezi, Shtëpia botuese “Fahri Fazliu”, Kastriot- 2013
82. “Rinjohja”, Poezi, Shoqata e Shkrimtarëve “Fahri Fazliu”- Kastriot, 2013
83. “Diku në fund të një fillimi”, Poezi, Shoqata e Shkrimtarëve, “Fahri Fazliu”- Kastriot, 2013
84. “Makthi i hijes”, Poezi, Shoqata e Shkrimtarëve-“Fahri Fazliu”Kastriot, 2013
85. “Një zog prej uji”, Poezi, Shoqata e Shkrimtarëve “Fahri Fazliu”- Kastriot
86. “Asnjë fjalë nuk frymon”, Poezi, Shoqata e Shkrimtarëve, “Fahri Fazliu” Kastriot, 2014
87. “Daullet e një nate”, Poezi, Shoqata e Shkrimtarëve “Fahri Fazliu” Kastriot ,2014
88. “Sytë e gurtë të erës”, Poezi, Shoqata e Shkrimtarëve “Fahri Fazliu” Kastriot, 2014
89. “Kur dehen perënditë” , Poezi, Shoqata e Shkrimtarëve “Fahri Fazliu” Kastriot ,2014
90. “Fjetëm njëqind shekuj”Prozë poetike, Shoqata e Shkrimtarëve “Fahri Fazliu” Kastriot , 2014
91. “Krakëllimat e natës”,Poezi, Shoqata e Shkrimtarëve “Fahri Fazliu” Kastriot, 2014
92. “Ndjekësit e enigmave”, Poezi, Shoqata e Shkrimtarëve “Fahri Fazliu” Kastriot ,2014
93. “Atdheu i paçmuar”Poezi, Shoqata e Shoqate e Shkrimtarëve “Fahri Fazliu” Kastriot, 2014

94. "Psalm i harruar ", Poezi, Shoqata e Shkrimtarëve, "Fahri Fazliu" Kastriot 2013
95. "Për kë po bie moj kamberë", Poezi Shoqata e Shkrimtarëve "Fahri Fazliu"-Kastriot, 2013
96. "Mbi flokët e ullukëve", Poezi, Shoqata e Shkrimtarëve "Fahri Fazliu" Kastriot 2013
97. "Menatë vijnë lejlekë", Poezi, Shoqata e Shkrimtarëve "Fahri Fazliu" Kastriot 2013
98. "Loti i gotës së dehur", Poezi, Shoqata e Shkrimtarëve "Fahri Fazliu" Kastriot 2013
99. " Stina asnjansë", Poezi, Shoqata e Shkrimtarëve "Fahri Fazliu" Kastriot 2013
- . 100 "Dëneste bashkë me erën", Poezi, Shoqata e Shkrimtarëve "Fahri Fazliu" Kastriot 2013
- 101 "Druri i pikëlluar", Poezi, Shoqata e Shkrimtarëve "Fahri Fazliu" Kastriot 2013



## PËRMBAJTJA

<b>Disa hije të blerta - cikli i parë .....</b>	<b>11</b>
Më lërë të qaj sonte .....	13
2. ....	14
3. ....	15
4. ....	16
5. ....	17
6. ....	18
7. ....	19
8. ....	20
9. ....	21
10. ....	22
11. ....	23
Ku vdesin kuajt e luftës .....	24
Veshi jonë anemik .....	25
I mjelim kallkanët .....	27
2. ....	28
Një mjegull e dendur .....	29
Fisi im .....	30
Për një puthje .....	31
Toka ime .....	32
As guri i varrit të gjyshit .....	33
Për pushkët e gjyshërve tanë .....	34
Disa hije të blerta .....	35
Kush i shkundi mollët .....	36
Që nuk i përket askujt .....	37
<b>Një dru i pikëlluat – cikli i dytë .....</b>	<b>39</b>
Nga trarët e tymosura .....	41
Vetëm heshtja e zhveshur .....	42
Kur ajo qante me ngashërim .....	43
Një mjegull e përhirtë .....	45

Çfarë të bëjë në këto çaste .....	47
Disa ikona të ardhura .....	48
Në çdo kafshim fsheharak .....	49
Muret akoma përplasen .....	50
Një yll gjashtë cepash .....	51
Në egon e tyre të shpërfillur .....	52
Rrugëve që nuk kanë dalje .....	53
Muret e lagështa të kujtesës .....	54
Varri .....	55
Sa herë që tërbohet .....	57
Valixhet .....	58
Noton mbi dallgët e ëndrrës .....	59
Dielli i harlisur si era .....	61
Shiu i zi sterrë .....	62
2. ....	63
3. ....	64
Dëshirat .....	65
Një dru i pikëlluar Mendimet .....	66
Delte vetëm njëherë në ditë .....	67
Ka mbetur në një ëndërr .....	68
<b>Çdo stinë është e bukur në Prizren-cikli i tretë..</b>	<b>69</b>
Janë delikate .....	71
Nuk mungojnë as këmishët .....	72
Një skile e egër bizantine .....	73
Vetëm një lis i vetmuar .....	74
Deshën .....	75
Vashat prej plastike .....	76
Mendimet .....	78
Çdo stinë është e bukur në Prizren .....	79
Mëkati .....	80
Aq shumë u besoj dallgëve .....	81
Prej një shekulli në tjetrin .....	82

Unë vij tek ti qyteti im .....	83
Sa për kureshtje .....	84
Mungon diçka e paqartë .....	85
Mësuam nga instinkti .....	87
Dyert e të gjitha fjalëve .....	88
Nuk të mërdhinë gishtërinjtë .....	89
Si nëpër një ëndërr .....	91

Katalogimi në botim – (CIP)

Biblioteka Kombëtare e Kosovës “Pjetër Bogdani”

821.18-1

Zaplluzha, Adem

Druri i pikëlluar / Adem Zaplluzha. - Kastriot :  
Shtëpia botuese “ Fahri Fazliu”, 2014. - 105 f. ; 21  
cm.

Shënime biografike për autorin : f. 93-101

**ISBN 978-9951-664-11-0**